

Sarajevo, 03.07.2013. godine  
Broj: 562/13

**ZAPISNIK I ZAKLJUČCI**  
**SA DRUGE SJEDNICE PREDSJEDNIŠTVA SKUPŠTINE**  
**SAVEZA OPĆINA I GRADOVA FEDERACIJE BIH**

U Sarajevu je dana 03.07.2013. godine održana Druga sjednica Predsjedništva Skupštine Saveza općina i gradova Federacije Bosne i Hercegovine (u daljem tekstu: Predsjedništvo Saveza).

Sjednici Predsjedništva Saveza prisustvovali su:

1. **g-din Husejin Smajlović**, načelnik Općine Zenica, predsjednik Predsjedništva Saveza
2. **g-din Agan Bunić**, načelnik Općine Bužim
3. **g-din Muhamed Ramović**, načelnik Općine Goražde
4. **g-din Emir Bubalo**, načelnik Općine Konjic
5. **g-din Rasim Omerović**, načelnik Općine Kalesija
6. **g-đa Amra Babić**, načelnica Općine Visoko
7. **g-đa Katija Skočibušić**, po ovlaštenju načelnika Općine Tomislavgrad
8. **g-đa Đejna Sarač**, po ovlaštenju načelnika Općine Vogošća
9. **g-đa Edina Habibija**, po ovlaštenju načelnika Općine Novo Sarajevo
10. **g-din Miroslav Lucić**, po ovlaštenju načelnika Općine Domaljevac-Šamac.

Pored gore navedenih, sjednici su prisustvovali i: **g-đa Ljiljana Perkušić**, službenik za upravu u OSCE-u, **g-đa Biserka Šarkanović**, projekt menadžer na CDMA projektu, **g-din Bojan Hadžihalilović**, Agencija Fabrika, **g-đa Vesna Travljanin**, direktor Saveza, **g-đa Elvira Imširović-Bolić**, viši saradnik za pravna pitanja, **g-đa Dženita Kovačević**, viši saradnik za finansijska pitanja i **g-đa Šejla Hasić**, viši saradnik za projekte.

G-din Husejin Smajlović pozdravlja prisutne i otvara Drugu sjednicu Predsjedništva Saveza. Predlaže Dnevni red kako slijedi:

1. Zapisnik i Zaključci sa Prve sjednice Predsjedništva Skupštine Saveza općina i gradova Federacije Bosne i Hercegovine
2. Zapisnik i Zaključci sa Vanredne sjednice Predsjedništva Skupštine Saveza općina i gradova Federacije Bosne i Hercegovine
3. Sporazum o saradnji između Parlamenta Federacije Bosne i Hercegovine i Saveza općina i gradova Federacije Bosne i Hercegovine  
Izjavitelj: Vesna Travljanin, direktor Saveza
4. Plan rada Saveza općina i gradova Federacije Bosne i Hercegovine za period 2013. – 2014. godina  
Izjavitelj: Vesna Travljanin, direktor Saveza
5. Zabilješke sa sjednica:
  - a) Komisije za razvoj i unapređenje lokalne samouprave  
Izjavitelj: Miroslav Lucić, predsjednik Komisije
  - b) Komisije za imovinska pitanja, prostorno uređenje, stambeno-komunalne djelatnosti i zaštitu životnog okoliša

- Izvjestilac: Nermin Mandra, predsjednik Komisije
- c) Komisije za ekonomski razvoj općina i gradova i finansije  
Izvjestilac: Radinka Dujak, predsjednica Komisije
6. Odluka o imenovanju Radne grupe Saveza općina i gradova Federacije Bosne i Hercegovine za izradu radnog materijala prijedloga Zakona o lokalnoj samoupravi Kantona Sarajevo  
Izvjestilac: Elvira Imširović-Bolić, viši saradnik za pravna pitanja
7. Nacrt Odluke o visini članskog doprinosa za finansiranje aktivnosti Saveza općina i gradova Federacije BiH  
Izvjestilac: Vesna Travljanin, direktor Saveza
8. Izvještaj o aktivnostima Saveza na projektima:
- a) OSCE projekat „Podrška savezima općina i gradova“ (AMCS)  
Izvjestilac: Ljiljana Perkušić, službenik za upravu, OSCE
- b) Projekat „Načelnici za razvoj lokalne samouprave“  
Izvjestilac: Vesna Travljanin, direktor Saveza
- c) Aktivnosti u okviru projekta „Jačanje kapaciteta saveza općina i gradova u BiH“ – CDMA  
c 1) Izvještaj o EU integracijama: preporuke za buduće aktivnosti Saveza i kratak izvještaj sa posjete institucijama Republike Hrvatske  
Izvjestilac: Vesna Travljanin, direktor Saveza
- d) Aktivnosti u okviru projekta „Podrška jačanju lokalne samouprave FBiH u pružanju efektivnijih i efikasnijih usluga“ koji Savez sprovodi u saradnji sa UNDP-om  
d 1) Implementacija projektne komponente LOD III (Jačanje lokalne demokratije/demokracije)  
Izvjestilac: Elvira Imširović-Bolić, viši saradnik za pravna pitanja  
d 2) Implementacija projektne komponente ILDP (Projekat integriranog lokalnog razvoja)  
Izvjestilac: Zlata Turkić, viši saradnik za rad sa skupštinskim komisijama i institucijama vlasti  
d 3) Implementacija projektne komponente MTS (Sistem obuke za jedinice lokalne samouprave)  
Izvjestilac: Šejla Hasić, viši saradnik za projekte

## 9. Tekuća pitanja

G-din Husejin Smajlović otvara raspravu po dnevnom redu. Nakon konstatacije da nema prijavljenih, stavlja dnevni red na glasanje.

### **Dnevni red je jednoglasno usvojen.**

#### **1. Zapisnik i Zaključci sa Prve sjednice Predsjedništva Skupštine Saveza općina i gradova Federacije Bosne i Hercegovine**

G-din Husejin Smajlović otvara raspravu, konstatuje da nema komentara, te stavlja Zapisnik i zaključke na glasanje.

**Zapisnik i zaključci sa Prve sjednice Predsjedništva Skupštine Saveza općina i gradova Federacije Bosne i Hercegovine jednoglasno su usvojeni.**

#### **2. Zapisnik i Zaključci sa Vanredne sjednice Predsjedništva Skupštine Saveza općina i gradova Federacije Bosne i Hercegovine**

G-din Husejin Smajlović otvara raspravu, konstatuje da nema komentara, te stavlja Zapisnik i zaključke na glasanje.

**Zapisnik i zaključci sa Vanredne sjednice Predsjedništva Skupštine Saveza općina i gradova Federacije Bosne i Hercegovine jednoglasno su usvojeni.**

### **3. Sporazum o saradnji između Parlamenta Federacije Bosne i Hercegovine i Saveza općina i gradova Federacije Bosne i Hercegovine**

G-đa Vesna Travljanin podsjeća prisutne da je na Skupštini Saveza održanoj u Fojnici aktuelizirano potpisivanje sporazuma sa Parlamentom Federacije BiH. Dakle, pored sporazuma koji je Savez potpisao sa Vladom Federacije BiH, predlaže se potpisivanje sporazuma sa Parlamentom Federacije BiH. Navodi da je tekst Sporazuma dostavljen u materijalima. Obavještava prisutne da se u izvještaju Freedom House-a spominje da je potpisan sporazum između Saveza i Vlade Federacije BiH, kao i u izvještaju Evropske komisije. Smatra da je to značajano dostignuće za Savez.

G-din Emir Bubalo dodaje da od Sporazuma koji je potpisan sa Vladom FBiH, jedinice lokalne samouprave nisu dobile ništa. Navodi da lokalne zajednice još uvijek vraćaju dugove koje su potpisali viši nivoi vlasti. Ističe da su u prethodnom periodu imali dobru saradnju sa Parlamentom FBiH, te da sporazum treba potpisati. S druge strane treba istaći da od Sporazuma sa Vladom FBiH nisu imali ništa. Dalje navodi da se doprinosi trebaju plaćati prema mjestu prebivališta. Za primjer navodi Općinu Centar koja po tom osnovu ima velika sredstva, a Konjic koji je veći od teritorije Kantona Sarajevo nema ništa po osnovu doprinosa. Ističe da on nema ništa protiv, ali da je takvo rješenje ravno segregaciji.

G-din Husejin Smajlović navodi da nema dileme da sporazum neće ništa riješiti, ali će pomoći da se u budućnosti spriječe situacije neuvažavanja Saveza.

G-din Rasim Omerović konstatuje da je potpisivanje Sporazuma sa Vladom FBiH bila samo njihova reklama. Smatra da treba potpisati sporazum sa Parlamentom FBiH, jer može koristiti. Navodi za primjer Zakon o zaposlenicima u organima jedinica lokalne samouprave koji nije prošao u Domu naroda, te da Savez nije uvažan, kao i problemi sa kojima se susreću jedinice lokalne samouprave. Ističe da viši nivoi vlasti ne moraju ništa raditi, ali da lokalni nivo mora.

G-din Husejin Smajlović konstatuje da potpisivanje ovog sporazuma neće ništa radikalno promijeniti, ali će se moći pozvati na njega.

G-din Husejin Smajlović stavlja na glasanje tekst Sporazuma o saradnji između Parlamenta Federacije Bosne i Hercegovine i Saveza općina i gradova Federacije Bosne i Hercegovine.

**Jednoglasno je usvojen tekst Sporazuma o saradnji između Parlamenta Federacije Bosne i Hercegovine i Saveza općina i gradova Federacije Bosne i Hercegovine.**

### **4. Plan rada Saveza općina i gradova Federacije Bosne i Hercegovine za period 2013. – 2014. godina**

G-đa Dženita Kovačević izvještava da je Plan rada Saveza općina i gradova Federacije Bosne i Hercegovine za period 2013. – 2014. godina ažuriran na zajedničkoj sjednici skupštinskih komisija, te je dostavljen u materijalima za sjednicu.

G-din Rasim Omerović predlaže da ubuduće Plan rada Saveza bude ranije dostavljan.

G-din Emir Bubalo ima primjedbu na Plan rada u smislu da u njemu treba naznačiti da se u praksi ne implementira Zakon o principima lokalne samouprave u Federaciji BiH, da se ne poštuju presude Ustavnog suda, da jedinice lokalne samouprave plaćaju troškove vezane za obrazovanje, a da kantoni ne prebacuju sredstva za te namjene itd. Podsjeća da su u proceduri izmjene Zakona o principima lokalne samouprave u FBiH, te ga zbog toga treba prvog staviti u Plan rada Saveza i napomenuti da se svi ostali

zakoni moraju uskladiti sa ovim zakonom. Navodi primjer poljoprivrednog zemljišta koje se vodi u gruntu kao voćnjak, te problema koji se pojave u praksi kako bi se to zemljište pretvorilo u građevinsko. Zbog ovog problema građani moraju mjesecima hodati po institucijama Kantona koje se nalaze u Mostaru. Dalje ističe da Općina sama sebi ne može izdati građevinsku dozvolu.

G-din Husejin Smajlović stavlja na glasanje Plan rada Saveza općina i gradova Federacije Bosne i Hercegovine za period 2013. – 2014. godina

**Plan rada Saveza općina i gradova Federacije Bosne i Hercegovine za period 2013. – 2014. godina je usvojen sa 9 glasova ZA i jednim SUZDRŽAN.**

## **5. Zabilješke sa sjednica:**

### **a) Komisije za razvoj i unapređenje lokalne samouprave**

G-din Miroslav Lucić, predsjednik Komisije za razvoj i unapređenje lokalne samouprave, konstatuje da su svi prisutni dobili materijal za ovu tačku dnevnog reda u pisanoj formi, te ukratko obrazlaže šta je zaključeno na sjednici Komisije. Navodi da je razmatran Zakon o izmjenama i dopunama Zakona o pripadnosti javnih prihoda, te je zaključeno da se ostane kod stava da se postotak po osnovu PDV-a poveća sa 8,42 na 10% za jedinice lokalne samouprave. U vezi sa ovim zakonom predloženo je da se naloži kantonima da jedinicama lokalne samouprave dodijeli najmanje 10% od poreza na dobit i 50% od poreza na dohodak. Ističe da je na sjednici komisije izvjestilac o Zakonu o razvoju male privrede bio predstavnik iz resornog ministarstva, te da nije bilo nekih posebnih zaključaka u vezi sa ovim zakonom. Dalje navodi da je komisija predložila da se Zakon o izmjenama i dopunama Zakona o principima lokalne samouprave u Federaciji BiH ne podrži.

G-din Husejin Smajlović otvara raspravu, te čestita komisiji na dobro urađenom poslu.

G-din Rasim Omerović konstatuje da komisije sve odrade, ali je problem u daljem nastavku aktivnosti prema Vladi i Parlamentu. Smatra da treba nastaviti sa pritiscima. Ističe činjenicu da Savez traži da zakoni budu bolji, jer je na terenu uočeno šta su problemi. Navodi da treba naći instrumente za ostvarivanje ciljeva Saveza, jer sve što se uradi završi samo kod nas.

G-din Miroslav Lucić ističe da će sada komentarisati u funkciji zamjene za načelnika Željka Josića kao člana Predsjedništva, a ne kao predsjednik Komisije. Predlaže da se usvoji zaključak kako dalje postupati prema višim nivoima vlasti. Smatra da moraju biti agresivniji, drskiji, arogantniji. Podsjeća na činjenicu da su osobe koje obnašaju sve te funkcije, ljudi koji dolaze iz lokalnih zajednica.

G-din Emir Bubalo predlaže da se svi zaključci koji se donesu na našim sjednicama dostavljaju Komisiji za lokalnu samoupravu Predstavničkog doma i Odboru za pravdu, opću upravu i lokalnu samoupravu Doma naroda Parlamenta Federacije Bosne i Hercegovine, iz razloga što nas oni uvijek podržavaju.

G-din Husejin Smajlović predlaže da se na kraju današnje sjednice dogovore o daljim koracima koje treba poduzeti prema višim nivoima vlasti.

G-din Husejin Smajlović stavlja na glasanje Zabilješku sa sjednice Komisije za razvoj i unapređenje lokalne samouprave sa prijedlozima zaključaka.

**Jednoglasno je usvojena Zabilješka sa sjednice Komisije za razvoj i unapređenje lokalne samouprave sa prijedlozima zaključaka.**

### **b) Komisije za imovinska pitanja, prostorno uređenje, stambeno-komunalne djelatnosti i zaštitu životnog okoliša**

G-đa Dženita Kovačević obavještava prisutne da kolegica Zlata Turkić vodi sjednice skupštinskih komisija, ali da je iz zdravstvenih razloga spriječena da prisustvuje današnjoj sjednici. Ukratko obrazlaže šta je zaključeno na sjednici Komisije.

G-din Husejin Smajlović stavlja na glasanje Zabilješku sa sjednice Komisije za imovinska pitanja, prostorno uređenje, stambeno-komunalne djelatnosti i zaštitu životnog okoliša sa prijedlozima zaključaka.

**Jednoglasno je usvojena Zabilješka sa sjednice Komisije za imovinska pitanja, prostorno uređenje, stambeno-komunalne djelatnosti i zaštitu životnog okoliša sa prijedlozima zaključaka.**

### **c) Komisije za ekonomski razvoj općina i gradova i finansije**

G-đa Dženita Kovačević navodi da je ova komisija razmatrala Nacrt Zakona o budžetima. Ističe da je u tekstu Zakona predviđeno da Savez ima člana u Fiskalnom koordinacionom tijelu Federacije BiH. Smatra da ta činjenica ima i prednosti i mane. Prednost je u tome što smo dio sistema, a nedostatak što kod donošenja odluka uvijek možemo biti nadglasani. Dalje informiše o inicijativi Općine Zavidovići koja se odnosi na izmjenu Pravilnika o načinu uplate javnih prihoda u Federaciji BiH, te o inicijativi Općine Foča Ustikolina koja se odnosi na direktnu pomoć nerazvijenim općinama u Federaciji BiH.

G-din Husejin Smajlović stavlja na glasanje Zabilješku sa sjednice Komisije za ekonomski razvoj općina i gradova i finansije sa prijedlozima zaključaka.

**Jednoglasno je usvojena Zabilješka sa sjednice Komisije za ekonomski razvoj općina i gradova i finansije sa prijedlozima zaključaka.**

## **6. Odluka o imenovanju Radne grupe Saveza općina i gradova Federacije Bosne i Hercegovine za izradu radnog materijala prijedloga Zakona o lokalnoj samoupravi Kantona Sarajevo**

G-đa Vesna Travljanin podsjeća da su, nakon usvajanja Zakona o principima lokalne samouprave u Federaciji BiH koji je usvojen 2006. godine, svi kantoni imali obavezu donošenja svojih zakona o lokalnoj samoupravi. Obavještava prisutne da Kanton Sarajevo još nije donio svoj zakon. Ističe da je Ministarstvo pravde i uprave Kantona Sarajevo koje je nadležno za izradu ovog zakona i ranijih godina posao izrade Zakona pokušalo prebaciti na Savez. Na sastanku koji je održan u maju mjesecu ove godine, Ministarstvo je zaključilo da se u okviru Saveza općina i gradova FBiH formira radna grupa od predstavnika svih jedinica lokalne samouprave sa područja Kantona Sarajevo koja će u roku od šezdeset dana izraditi radni materijal Prijedloga Zakona o lokalnoj samoupravi Kantona Sarajevo. U tom smislu, Savez je, želeći dati svoj doprinos u ovoj oblasti, uputio dopis svim općinama sa područja Kantona Sarajevo, kao i Gradu Sarajevo, da imenuju svoje predstavnike u Radnu grupu. S obzirom na rok koji uskoro ističe, tačnije 13.07.2013. godine, Radna grupa se sastala dva puta. Predlaže Predsjedništvu usvajanje zaključka da se Ministarstvu vrati posao izrade ovog zakona jer je ono nadležno za to. Također predlaže da se Ministarstvu dostave i zaključci sa dva sastanka koji su održani u organizaciji Saveza. Konstatuje da je Savez organizacijom ovih sastanaka pomogao svojim članicama u okviru roka koji je ostavljen.

G-din Emir Bubalo smatra da kantoni uopće ne trebaju donositi svoje kantonalne zakone iz ove oblasti, jer svi donose zakone u skladu sa federalnim zakonom, odnosno prepisuju ga.

G-din Husejin Smajlović konstatuje da je specifična organizacija Kantona Sarajevo u odnosu na druge kantone. Smatra da Savez ne treba ulaziti u ovaj proces. Misli da se oni trebaju dogovoriti između sebe, te da nema potrebe da Savez arbitrira u tom procesu.

G-đa Amra Babić ističe da bi trebalo da se sačeka i vidi šta će donijeti aktuelni preustroj Federacije.

G-din Emir Bubalo navodi problem navođenja podijeljenih nadležnosti u Ustavu, te zbog te činjenice svi tumače da imaju nadležnost.

G-din Husejin Smajlović stavlja na glasanje zaključak da Savez općina i gradova Federacije Bosne i Hercegovine ne raspolaže dovoljnim kapacitetima za izradu radnog materijala prijedloga Zakona o lokalnoj samoupravi Kantona Sarajevo. Predlaže da se konstatuje da je izrada Prijedloga Zakona o lokalnoj samoupravi u nadležnosti Ministarstva pravde i uprave Kantona Sarajevo. Predlaže da se pozovu svi subjekti čije će nadležnosti biti tretirane ovim zakonom, da pokažu visok stepen tolerancije u svrhu iznalaženja najboljih rješenja, kako ne bi bilo potrebe da bilo ko (pa ni Savez) arbitrira u ovom procesu.

**Jednoglasno su usvojeni slijedeći zaključci:**

- **Savez općina i gradova Federacije Bosne i Hercegovine ne raspolaže dovoljnim kapacitetima za izradu radnog materijala prijedloga Zakona o lokalnoj samoupravi Kantona Sarajevo.**
- **Konstatuje se da je izrada Prijedloga Zakona o lokalnoj samoupravi u nadležnosti Ministarstva pravde i uprave Kantona Sarajevo.**
- **Pozivaju se svi subjekti čije će nadležnosti biti tretirane ovim zakonom, da pokažu visok stepen tolerancije u svrhu iznalaženja najboljih rješenja, kako ne bi bilo potrebe da bilo ko (pa ni Savez) arbitrira u ovom procesu.**

**7. Nacrt Odluke o visini članskog doprinosa za finansiranje aktivnosti Saveza općina i gradova Federacije BiH**

G-đa Vesna Travljanin podsjeća prisutne na zaključak sa prethodne sjednice kojim je određeno da menadžment Saveza posjeti općine koje ne uplaćuju članarinu. Također podsjeća da je zaključeno da se pripremi nova odluka o finansiranju Saveza. U vezi sa ovim zaključkom, održan je sastanak na kojem su urađeni razni modeli, ali nacrt odluke još nije gotov iz razloga što se radi o obimnom poslu. Navodi da Savez posjeduje široku bazu finansija jedinica lokalne samouprave, te da to sve treba obraditi. Ističe da bi Savez mogao funkcionisati kada bi naplativost članskog doprinosa bila 100%.

G-đa Amra Babić traži da joj se dostavi važeća Odluka o visini članskog doprinosa.

**Informacija je primljena k znanju.**

**8. Izvještaj o aktivnostima Saveza na projektima:**

**a) OSCE projekat „Podrška savezima općina i gradova“ (AMCS)**

G-đa Ljiljana Perkušić, službenik za upravu u OSCE-u se zahvaljuje na prilici da se obrati prisutnima. Navodi da je ona u OSCE-u zadužena za provođenje svih projekata koji se rade sa Savezom, te za primjer navodi Beacon Schema-u i Vodič za upravljanje ljudskim resursima. Ovom prilikom želi da informiše prisutne o novom projektu „Podrška savezima općina i gradova“, koji je OSCE razvio zajedno sa savezima i odabranim predstavnicima jedinica lokalne samouprave. Ističe da se radi o jednom većem projektu, jer OSCE ukida terenske kancelarije pa želi da saraduje sa domaćim institucijama. Cilj projekta je jačanje veza i saradnje između Saveza i općinskih vijeća, kao i jačanje uloge Saveza kao veze između jedinica lokalne samouprave i viših nivoa vlasti. Ističe tri projektna rezultata koja će se razviti kroz implementaciju projekta: Savez će uspostaviti ad-hoc radnu grupu u sklopu relevantne komisije kao podršku jačanju saradnje između Saveza i općinskih vijeća, uspostaviti jaču saradnju i osnažiti funkciju općinskih koordinatora za rad sa Savezom, te raditi na uspostavljanju jače komunikacije sa višim nivoima vlasti. Navodi da će OSCE raditi sa Savezom na izradi projekta za 2014. i 2015. godinu, te da će informisati Predsjedništvo o istome putem Stručne službe.

**Informacija je primljena k znanju.**

**b) Projekat „Načelnici za razvoj lokalne samouprave“**

G-đa Vesna Travljanin informiše o ovom projektu koji se implementira uz finansijsku podršku SDC. Kao što je već ranije informisala, u ovom projektu se radi na zakonima značajnim za jedinice lokalne samouprave. Obavještava prisutne o javnim raspravama koje se trenutno održavaju. Koristi se ovom prilikom da zamoli načelnike da dostave primjedbe na ove zakone, kako bi Savez u budućnosti opet dobio jedan ovakav projekat. Navodi koji su zakoni urađeni u ovom projektu. Ističe da je Savez dobio primjedbe od Federalne uprave civilne zaštite na Zakon o zaštiti i spašavanju, te navodi da će se predstavnici Saveza sastati sa njihovim predstavnicima po ovom pitanju.

G-din Emir Bubalo navodi da je bio na dvije rasprave, te da je bio jasan i izričit u pogledu ko treba finansirati kantonalne i federalnu upravu, zbog činjenice da lokalne zajedice od njih nemaju koristi. Ističe primjer požara u njegovoj općini prošle godine. Predlaže da naknada u 100% iznosu ide općinama. Ponovno podvlači da prihodi moraju ići općinama prema mjestu prebivališta, te da je to „ključ“.

G-din Rasim Omerović predlaže da se sa ovim zakonima odugovlači narednu godinu dana, iz razloga što bi njihovo usvajanje išlo u korist viših nivoa vlasti zbog izbora koji će se održati naredne godine.

**Informacija je primljena k znanju.**

**c) Aktivnosti u okviru projekta „Jačanje kapaciteta saveza općina i gradova u BiH“ – CDMA  
c 1) Izvještaj o EU integracijama: preporuke za buduće aktivnosti Saveza i kratak izvještaj sa posjete institucijama Republike Hrvatske**

G-đa Biserka Ivanović-Šarkanović se zahvaljuje Predsjedništvu Skupštine Saveza što joj je data mogućnost da izvijesti o CDMA projektu, te čestita načelnicima na funkcijama koje obnašaju. Ističe da su svi prisutni dobili informaciju u vezi sa ovom tačkom dnevnog reda u pisanoj formi. Navodi da je jedna od komponenti CDMA projekta rad na pitanjima vezanim za EU integracije. Dalje izvještava da je u sklopu ove komponente provedeno niz aktivnosti kako slijedi: održan je sastanak oba saveza na temu uspostavljanja jedinica za EU integracije u okviru saveza; provedeno je istraživanje koje je rezultiralo izvještajem sa preporukama za dalje djelovanje Saveza u tom smjeru; savezi su posjetili institucije u Republici Hrvatskoj u sklopu jačanja prekogranične saradnje. Informiše da je izvještaj napisao g-din Samir Šošević, te da je uputio slijedeće preporuke po pitanju uključenosti Saveza u proces EU integracija: Savez treba da kontinuirano informiše svoje članice o svim relevantnim pitanjima vezanim za EU integracije (EU fondovi, harmonizacija zakonodavstva, informacije o održavanju konferencija, sastanka i skupova na temu EU integracija itd.); Savez treba u sklopu svojih mogućnosti da pruži tehničku pomoć svojim članicama za apliciranje na IPA projekte; Savez treba graditi svoje unutrašnje kapacitete, te pokušati dogovoriti sa EU delegacijom u BiH da njihov uposlenik jedan dan u sedmici radi u prostorijama Saveza kako bi na taj način podizao kapacitete uposlenika Saveza ili da Savez uposli osobu sa dobrim poznavanjem pravila EU koji bi bio plaćen sa nekog od projekta koji Savez implementira. Moli da se ove preporuke usvoje od strane Predsjedništva. Dalje informiše o posjeti saveza institucijama Republike Hrvatske u sklopu jačanja prekogranične saradnje. Tokom te posjete su saznali značajne informacije kao što su: da je sam proces približavanja Republike Hrvatske EU približio i ojačao veze krovnih organizacija lokalne samouprave sa institucijama vlasti u Republici Hrvatskoj; osigurao da u Kongresu lokalnih i regionalnih vlasti sjede predstavnici ovih krovnih organizacija; da je od velike važnosti da se investira u izgradnju sopstvenih kapaciteta; istaknuta je važnost poštovanja procedura javnih nabavki kako je to regulisano u EU; te koja su to dobra i loša iskustva kroz koja je prošla Hrvatska u toku procesa pristupanja EU. Ističe da je jedna od preporuka posjete Republici Hrvatskoj potpisivanje Sporazuma o

saradnji sa Udrugom gradova i Udrugom općina. Navodi da je ovo značajno iz razloga obostrane koristi koje mogu imati asocijacije kroz IPA projekte prekogranične saradnje.

G-đa Šejla Hasić informiše da je Savez jučer uputio dopis za apliciranje za tehničku pomoć jedinicama lokalne samouprave koje žele pripremiti projektni prijedlog za poziv koji je objavila EC u BiH (EU CFP 13 004), a čiji je rok 20.09.2013. godine. Navodi da je Savez u saradnji sa UNDP-om u mogućnosti pružiti tehničku pomoć za deset jedinica lokalne samouprave. Ističe da je ovo dobra šansa za jedinice lokalne samouprave da pripreme projekat, pa i ako ga ne prijave na ovaj već objavljeni poziv, imaju gotov projekat za buduće pozive.

G-din Rasim Omerović upozna je pisutne da njegova općina već radi preko IPA fondova i to sa Općinom Krupa iz Srbije i Općinom Nijemci iz Hrvatske. Smatra da bi ovdje Savez trebao imati ključnu ulogu u traženju partnera. Ističe da njegova općina ima sreće jer graniči i sa Hrvatskom i sa Srbijom. Navodi da rade i sa NERDA-om. Ističe problem za općine što svi projekti moraju biti napisani na engleskom jeziku, a općine nemaju kapaciteta po ovom pitanju. Misli da Savez mora biti još agresivniji.

G-din Muhamed Ramović također ističe problem stručnog kadra, jer moraju primiti pet ljudi da rade ove poslove. Navodi izvrstan primjer Bijeljine u vezi sa ovim.

G-đa Šejla Hasić konstatuje da će pozivi i projekti uvijek biti na engleskom jeziku, te da se to neće promijeniti. Ističe da je moguće napisati dobar projekat i onda nekome platiti da ga prevede na engleski jezik.

G-đa Biserka Šarkanović-Ivanović moli za odluku Predsjedništva kako bi se moglo krenuti putem pripreme Sporazuma sa Republikom Hrvatskom.

G-din Rasim Omerović konstatuje da sada svi oni koji rade sa Hrvatskom, imaju partnera iz Evropske Unije.

**Informacija je primljena k znanju uz zaključak da se pokrenu aktivnosti na izradi Sporazuma između Saveza općina i gradova Federacije Bosne i Hercegovine i Udruge općina i Udruge gradova iz Republike Hrvatske.**

G-đa Vesna Travljanin podsjeća prisutne da je Predsjedništvo Skupštine Saveza već ranije usvojilo zaključak da se krene u aktivnosti u vezi sa izradom novog vizuelnog identiteta Saveza. Obavještava prisutne da su u tu svrhu na današnju sjednicu pozvani predstavnici Agencije Fabrika da prezentiraju prijedloge.

G-din Bojan Hadžihalilović u ime Agencije Fabrika prezentira prijedloge koje su pripremili za novi logo Saveza. Prezentira prijedloge na kojima je općeprihvaćena odrednica za gradove i općine na svim mapama svijeta.

G-đa Vesna Travljanin navodi da se Stručna služba opredijelila za dva prijedloga, te upozna je prisutne koji su to od prezentiranih prijedloga. Smatra da Savez treba da se opredijeli za ozbiljnije prijedloge, s obzirom na djelatnost koju obavlja.

G-đa Biserka Šarkanović-Ivanović informiše prisutne da je u sklopu CDMA projekta za izradu novog vizuelnog identiteta izabrana Fabrika, kao najjača kuća. Navodi da ista ima iskustva i u regiji.

G-đa Amra Babić navodi da je ovi prijedlozi podsjećaju na suze, što svakako ima simbolike u odnosu na položaj u kojem se nalaze jedinice lokalne samouprave u Federaciji BiH.

G-din Husejin Smajlović stavlja na glasanje zaključak da Fabrika razradi varijantu loga sa oznakom za grad (pin) koja se koristi na elektronskim mapama u okvirima predloženih boja (plava, žuta i siva).

**Jednoglasno je usvojen zaključak da Agencija Fabrika razradi varijantu loga sa oznakom za grad (pin) koja se koristi na elektronskim mapama u okvirima predloženih boja (plava, žuta i siva).**



**d) Aktivnosti u okviru projekta „Podrška jačanju lokalne samouprave FBiH u pružanju efektivnijih i efikasnijih usluga“ koji Savez sprovodi u saradnji sa UNDP-om**

**d 1) Implementacija projektne komponente LOD III  
(Jačanje lokalne demokratije/demokracije)**

G-đa Elvira Imširović-Bolić navodi da je informacija u vezi sa ovom tačkom dnevnog reda dostavljena u pisanoj formi. S obzirom na činjenicu da je u današnjoj diskusiji spomenuto da jedinice lokalne samouprave imaju problema u vezi sa pisanjem projektnih prijedloga na engleskom jeziku, podsjeća da u LOD metodologiji koju su svi načelnici dobili na Skupštini Saveza, postoji forma projektnog prijedloga na našem jeziku, te da istu općine/gradovi mogu dobro iskoristiti u tu svrhu. Navodi da je Evropska Unija najavila da će finansijski podržati LOD IV, te podsjeća na uvjete koje su jedinice lokalne samouprave morale ispuniti da bi mogle aplicirati na ranije pozive.

**Informacija je primljena k znanju.**

**d 2) Implementacija projektne komponente ILDP (Projekat integriranog lokalnog razvoja)**

G-đa Šejla Hasić navodi da su materijali za ovu tačku dnevnog reda dostavljeni u pisanoj formi. Podsjeća da na ovoj komponenti radi kolegica Zlata Turkić koja je u bolnici. Dalje izvještava o ILDP komponenti, te ističe da Savez radi na horizontalnoj usaglašenosti strateških planova općina.

**Informacija je primljena k znanju.**

**d 3) Implementacija projektne komponente MTS  
(Sistem obuke za jedinice lokalne samouprave)**

G-đa Šejla Hasić napominje prisutne da su u materijalima dobili Informaciju o aktivnostima na implementaciji MTS komponente u sklopu projekta koji Savez implementira u saradnji sa UNDP-om. Obavještava prisutne da su do sada implementirane ukupno 32 obuke za (novo)izabrane vijećnike u Federaciji BiH, uz učešće preko 450 vijećnika. U narednom periodu planirano je još sedam osnovnih obuka. Također, g-đa Hasić napominje da će Savez u saradnji sa UNDP-om pripremiti i implementirati i dvije specifične obuke za općinske vijećnike, a na osnovu upitnika koje ispunjavaju vijećnici, te progresivni seminar za (novo)izabrane načelnike o kojima će članice biti blagovremeno obavještene. Navodi da su vijećnici najzainteresovaniji za obuke iz budžeta i upravljanja općinskom imovinom.

**Informacija je primljena k znanju.**

**9. Tekuća pitanja**

G-din Husejin Smajlović konstatuje da imamo Zakon o principima lokalne samouprave u FBiH, Sporazum sa Vladom FBiH, te otimačinu sredstava od strane viših nivoa vlasti. Smatra da je sazrelo vrijeme za pripremu jednog pisma koje treba uputiti premijeru Vlade Federacije BiH i predsjedavajućim oba doma Parlamenta Federacije BiH. U pismu se treba pozvati na ove akte koje je naprijed naveo. Također treba navesti da ih pozivamo na bolju i korektniju saradnju. Konstatuje da smo do sada dostavljali naše stavove, ali nismo imali njihove reakcije. Misli da fokus treba staviti na Zakon o pripadnosti javnih prihoda. U pismu bi trebalo navesti da cijenimo da bi bilo dobro da se sastanemo i da razgovaramo. U prilogu pisma treba dostaviti šezdeset (60) zakona i presude Ustavnog suda. Predlaže da se pripremljeni dopis pošalje svim članovima Predsjedništva da daju primjedbe, te nakon toga poslati na naprijed spomenute adrese.

### **Jednoglasno usvojeno.**

G-đa Vesna Travljanin informiše o sjednici Doma naroda Parlamenta FBiH na kojoj je razmatran Nacrt Zakona o zaposlenicima u organima jedinica lokalne samouprave koji na žalost nije dobio podršku. Navodi da su delegati na sjednici pitali ko je Savez, te da je morala objašnjavati za govornicom. Ističe da je delegat Mustafa Kurtović, bivši načelnik Općine Goražde i član Predsjedništva, podržao Savez, te naveo da je to ozbiljna organizacija. Navodi da bi trebalo organizirati jednu tematsku sjednicu u toku mjeseca septembra sa delegatima iz Doma naroda Parlamenta FBiH koja bi bila finansirana iz CDMA projekta.

### **Informacija je primljena k znanju.**

G-din Agan Bunić se nadovezuje na ono što je naveo g-din Smajlović prije nekoliko minuta. Ističe da na nivou Unsko-sanskog kantona imaju isti problem kao na nivou Federacije, te da na nivou tog kantona postoji grubo kršenje prava na lokalnu samoupravu. Kanton apsolutno ne konsultira jedinice lokalne samouprave sa tog područja niti za raspodjelu prihoda, niti za zakon o šumama itd. Smatra da postoji potreba da se slično pismo napiše i uputi Unsko-sanskom kantonu.

G-din Husejin Smajlović ističe da prvo treba pismo uputiti federalnom nivou, pa se nakon toga spustiti na nivo kantona. Navodi da su sva namjenska sredstava dali za plate.

G-din Agan Bunić se stavlja na raspolaganje da napiše pismo za kantonalni nivo, te da isto dostavi Stručnoj službi Saveza.

### **Jednoglasno usvojeno.**

G-din Emir Bubalo traži da se usvoji zaključak za ustavne amandmane, u smislu da imamo stav da kantoni nemaju nikakvu ulogu, te da se isti ukinu prije nego svi propadnu. Smatra da je sa aktuelnim amandmanima čak pojačana uloga kantona.

G-din Husejin Smajlović navodi da je tokom rasprava o preustroju Federacije shvatio da nema ništa od ustavnih promjena. Informiše da u okviru Saveza imamo načelnike iz reda hrvatskog naroda koji nisu za prijedlog o kojem je govorio g-din Bubalo, te da se to mora poštovati.

G-din Rasim Omerović se pita zašto oni koji su pokrenuli projekat ustavnih promjena mijenjaju Ustav Federacije, a ne Ustav države.

G-đa Amra Babić se slaže da kantoni ne trebaju, ali isto tako ističe činjenicu da su isti u minusu jer imaju takve zakone. Navodi da ne treba dozvoliti da se to sruši na općine, jer ako se to desi, ugušiće se jedinice lokalne samouprave. Konstatuje da su to sve stvari o kojima niko ne priča.

G-din Emir Bubalo navodi da je svugdje u svijetu zdravstvo, policija, sudstvo i obrazovanje na nivou države. Dalje navodi da jedinice lokalne samouprave finansiraju kulturu i sport, a oni uzimaju novac.

G-din Husejin ističe da je to proces, te da treba spriječiti određene stvari prije nego dođe do težih posljedica. Navodi da Zeničko-dobojski kanton za tri godine nije izvršio niti jedan kapitalni projekat.

G-đa Vesna Travljanin informiše prisutne o održavanju NEXPO sajma u Rijeci u septembru, te ih poziva da se prijave. Napominje da je prvi NEXPO sajam održan u Sarajevu.

### **Informacija je primljena k znanju.**

Nakon što je konstatovano da su sve tačke Dnevnog reda iscrpljene, g-din Husejin Smajlović zatvara Druga sjednicu Predsjedništva Saveza u 13:20 sati.

Predsjednik Predsjedništva Skupštine Saveza  
Husejin Smajlović, s.r.